

# Legalisashon

Prokuradó general di Kolombia, Gustavo de Greiff, tabata implakabel den su guera kontra e kartèl di kokaína di Medellín. Pa motibu di su posishon firme, polis a logra lokalisá Pablo Escobar, i den un razia a mat'é na desèmber 1993. De Greiff a ser aploudí rònt mundu.

Ma awor e aplouso no solamente a desparesé; de Greiff asta ta ser kritiká pa su paisanonan i gobièrnu. Pakiko? Pasobra e prokuradó general ta deklará ku e guera kontra droga a fracasá. Apesar ku miles a bai será, i sentenanan di kolombiano a muri den e bataya kontra droga, tòg mas droga ta yega su destinashon ku tabata e kaso den pasado. De Greiff ta haña ku mester legalisá benta i uso di droga rònt mundu, i mantené kontròl riba esaki.

De Greiff no ta e promé pa proponé legalisashon. Di bèrdat, e benefisionan di legalisashon di un òf otro aktividat ku aktualmente ta kontra lei ta proklamá ku frekuensia.

Diferente aktividat ilegal ta pèsta nos islanan: droga, krímen, kareda di kabai, aborto, turistanan ta kana tòplès na bich, èts. Hopi idea ta presentá kon pa trata ku kondukta ilegal. Legalisashon ta un proposishon ku sa forma parti di e debatenan aki.

Proponentenan di legalisashon sa argumentá ku esaki lo resolvé hopi problema. Por ehèmpel, mayoria pèrsona enkarselá t'ei pa motibu di droga. Si nos legalisá droga, esei lo duna espasio den prizon pa kriminalnan ku ta "bèrdaderamente" peligroso. E tambe lo redusí krímennan instigá pa droga.

Un otro argumento ku esnan ku ke deshasí di sierto lei ta trese dilanti ku frekuensia ta: "Hende ku tin un tendensia di kometé sierto akto ku ta kontra lei, lo hasié tòg si e ta legal òf ilegal. P'esei, mihó eliminá e lei ku ta prohibí e akto ei."

Ma e echu ku hende lo ignorá òf kibra sierto lei, no ta un motibu válido pa deshasí di e lei. Si nos gobernantenan disidí pa legalisá droga (por ehèmpel), pasobra nan sa ku hende lo usa droga tòg, anto nan ta aprobá i asta promové kondukta ku ta peligroso pa nos komunidad, komunikando ku droga ta bon.

Si nos ta sigui e argumento ("hende lo kibra e lei tòg, p'esei mihó deshasí di e lei") te na su konklushon lógiko, nos lo konkluí ku e motibu ku hende ta kibra lei, ta pasobra tin lei. Hende lo hòrta tòg, hende lo mata tòg. P'esei, e mihó kos pa hasi ta eliminá tur lei i manda tur polis kas. Asina nos lo por deshasí di krímen!

E rasonamentu ei ta sumamente ridíkulo! Nos tur sa ku un komunidad MESTER mantené stèndertnan básiko di desensia, MESTER tin normanan ku ta limitá nos komportashon, MESTER tin reglanan ku ta indiká loke ta bon i malu pa e bienestar di nos komunidad. Nos ta prohibí droga, aborto, landamentu tòplès, èts. pasobra nos ta realisá ku e aktividatnan aki ta perhudiká nos komunidad.

Nos mester mantené un distinsjon skèrpi entre lei di Dios i leinan di hende. Leinan di hende ta imperfekto i tin bes mester evaluá si sierto akshon desaprobá pa lei por ser legalisá. Por ehèmpel, lo ta bon pa evaluá si por kambia leinan di tráfiiko ku ta pèmití outomobilistanan kore solamente 60 riba kareteranan prinsipal. Leinan asina por ta fleksibel.

Ma nos *nunka mester legalisá loke Dios ta kondená na un forma dirèkt òf indirèkt den Skritura*. "Lei di SEÑOR ta perfekto" (Salmo 19:7). Pa legalisá loke Dios ta kondená ta rebeldia kontra Dios, ta legalisashon di piká.

Pa legalisá loke Dios ta kondená sigur no ta e solushon. Dios nunca ta baha Su normanan, legalisando sierto akto. Hende simplemente tin ku someté na Dios Su lei perfekto. "Teme Dios i warda Su mandamentunan, pasobra esaki ta apliká na kada pèrsona. Pasobra Dios lo trese tur echu na huisio, tur kos ku ta skondí, sea bon òf malu" (Eklestiastes 12:13-14). Nota e teksto aki bon. Hende por rebeldiá i asta legalisá loke Dios ta kondená. Ma hende no por prevení Dios di husga piká legalisá!